



Broj: 05-04-20-774-5/25  
Maglaj, 03.04.2025. godine

Na osnovu člana 70., u vezi sa članom 64. stav (1) tačka b) Zakona o javnim nabavkama („Službeni glasnik BiH“, br. 39/14, 59/22 i 50/24), člana 25. Pravilnika o javnim nabavkama u Općini Maglaj („Službene novine Općine Maglaj“, broj 13/22) i člana 42. Statuta Općine Maglaj („Službene novine općine Maglaj“, br. 8/07, 3/08, 6/08 i 6/24), a u vezi sa Zapisnikom o pregledu i ocjeni ponuda, broj 05-04-20-650-2/25 od 17.03.2025. godine, u postupku javne nabavke „Vodovod Misurići – rekonstrukcija i proširenje sekundarne mreže“, Općinski načelnik donosi

## **ODLUKU**

o izboru najpovoljnijeg ponuđača

### **I**

Prihvata se preporuka Komisije za javne nabavke i ugovor o nabavci radova na vodovodu Misurići – rekonstrukcija i proširenje sekundarne mreže dodjeljuje se ponuđaču „KM-GRADNJA“ d.o.o. Tešanj, u skladu sa ponudom 26-03/25 od 24.03.2025. godine, po ukupnoj cijeni od 203.861,86 KM bez PDV-a, odnosno 209.896,17 KM sa uračunatim PDV-om.

### **II**

Ponuđač iz tačke I se oslobađa obaveze dostavljanja dokumentacije koja je tenderskom dokumentacijom određena kao dokumentacija koju dostavlja izabrani ponuđač, budući da je istu dostavio uz ponudu.

### **III**

Za realizaciju ove odluke zadužuje se Služba za urbanizam, geodetske i imovinsko-pravne poslove Općine Maglaj.

### **IV**

Ova odluka dostavlja se svim ponuđačima koji su učestvovali u postupku javne nabavke i ima se objaviti na internetskoj stranici Općine Maglaj.

## **O b r a z l o ž e n j e**

Odlukom o pokretanju postupka, broj 05-04-20-774/25 od 05.03.2025. godine, pokrenut je postupak javne nabavke „Vodovod Misurići – rekonstrukcija i proširenje sekundarne mreže“, putem otvorenog postupka. Predmetna javna nabavka objavljena je na portalu javnih nabavki, obavještenje o nabavci broj 1140-1-3-6-3-12/25 od 05.03.2025. godine. Sažetak obavještenja o nabavci objavljen je u „Službenom glasniku BiH“, broj 13/25.

Procijenjena vrijednost nabavke je 179.487,00 KM bez PDV-a, odnosno 210.000,00 KM sa PDV-om, a kriterij za dodjelu ugovora je najniža cijena.

Predmetni postupak je, u skladu sa svojim nadležnostima, provela Komisija za javne nabavke imenovana Odlukama br. 05-45-1-874/24 od 22.05.2024. godine i 05-45-1-874-1/24 od 12.09.2024. godine (u daljem tekstu: Komisija). U toku postupka, Komisija je zaprimila pristigle ponude, izvršila njihovo otvaranje, pregled i ocjenu, prema zahtjevima i kriterijima iz tenderske dokumentacije, o čemu je sačinila odgovarajuće zapisnike, u skladu sa čl. 63. stav (5) i 65. stav (2) Zakona o javnim nabavkama.

U predmetnom postupku, Komisija je utvrdila da su blagovremeno zaprimljene dvije ponude, prema redosljedu zaprimanja kako slijedi:

r/ b	Naziv ponuđača	Sjedište ponuđača	Datum i vrijeme zaprimanja	Broj protokola
1.	“Fuel Boss” d.o.o. Zenica	Goraždanska 80, Zenica	25.03.2025. 08,01h	2665
2.	“KM-gradnja” d.o.o. Tešanj	Ljetinić br. 2, Tešanj	26.03.2025. 07,50h	2709

Neblagovremenih ponuda nije bilo.

Zaprimljene ponude su prihvatljive prema formi, obliku i potpunosti, odnosno dostavljene su u zatvorenoj koverti, na kojoj su bili navedeni svi podaci traženi tenderskom dokumentacijom. Komisija je potom, na zatvorenoj sjednici, izvršila pregled i ocjenu ponuda, provjeravajući da li dostavljene ponude ispunjavaju zahtjeve u pogledu forme, ponuđene cijene, predmeta nabavke, kvalifikovanosti ponuđača i ostalih uslova traženih tenderskom dokumentacijom.

Komisija je utvrdila da ponuđač “Fuel Boss” d.o.o. Zenica ne ispunjava uslove za kvalifikaciju koji se odnose na tehničku i profesionalnu sposobnost, budući da nije dokazao iskustvo u izvođenju srodnih radova, kako je to traženo tenderskom dokumentacijom. Naime, tačkom 3.4. tenderske dokumentacije je propisano da ponuđač mora posjedovati iskustvo u uspješnoj realizaciji jednog ili više ugovora koji su za predmet imali radove srodne radovima koji su predmet ove nabavke, a čija je vrijednost bila minimalno 179.000,00 KM bez PDV-a, što dokazuje dostavljanjem spiska ugovora uz potvrde druge ugovorne strane o njihovoj realizaciji. Imenovani ponuđač je uz ponudu dostavio Potvrdu JP “Zenicagas” d.o.o. Zenica, broj 01-599/23 od 09.05.2023.godine, o uspješnoj realizaciji ugovora o javnoj nabavci mašinskih i građevinskih radova na izgradnji sekundarne distributivne gasne mreže u ul. Đerzelezova, te Potvrdu JP „Zenicagas“ d.o.o. Zenica, broj 01-675/24 od 28.06.2024. godine, o uspješnoj realizaciji ugovora o izvođenju građevinskih i montažerskih radova Poslovna zona Zenica 1 – primarna distributivna gasna mreža i ugovora o izvođenju građevinskih i mašinskih radova na izgradnji primarne distributivne gasne mreže na dionici Kantonalna bolnica Zenica–ul. Prve Zeničke brigade–ul. Margita–ul. Prof. Mustafe Čauševića. Komisija je konstatovala da se iskustvo u navedenim radovima ne može prihvatiti kao relevantno iskustvo u ovom postupku nabavke, s obzirom da su u pitanju isključivo radovi na distributivnoj gasnoj mreži, a predmet ovog postupka su radovi na vodovodnoj mreži. Premda se radi o građevinskim radovima na cjevovodima koji imaju neke zajedničke karakteristike, oni nisu u dovoljnoj mjeri srodni, zbog suštinskih razlike u funkciji i standardima, te korištenju različitih materijala i tehnologija izgradnje. Zbog navedenih razloga Komisija je ocijenila da ponuđač nije dokazao da posjeduje iskustvo u izvođenju radova srodnih radovima koji su predmet ovog postupka, kako je to traženo tenderskom dokumentacijom, te je njegova ponuda odbačena kao neprihvatljiva.

Ponudu ponuđača „KM-gradnja“ d.o.o. Tešanj Komisija je ocijenila prihvatljivom, s obzirom da ispunjava sve uslove i zahtjeve iz tenderske dokumentacije.

Po završetku poslova koji spadaju u njenu nadležnost, Komisija je sačinila zapisnik o pregledu i ocjeni ponuda, u kojem je detaljno navela sve informacije relevantne za predmetni postupak, kao i preporuku rukovodiocu ugovornog organa da ugovor za nabavku radova na vodovodu Misurići – rekonstrukcija i proširenje sekundarne mreže dodijeli ponuđaču „KM-gradnja“ d.o.o. Tešanj. Preporuka je, zajedno sa izvještajem o radu Komisije, dostavljena rukovodiocu ugovornog organa 03.04.2025. godine.

U postupku donošenja ove odluke, posebno su cijenjene činjenice da je Komisija, sastavljena od stručnih lica, pravilno i potpuno izvršila ocjenu kvalifikovanosti ponuđača, te ocjenu pristiglih ponuda, u skladu sa kriterijima iz tenderske dokumentacije. Ugovorni organ nije našao nepravilnosti niti propuste u radu Komisije, koji bi eventualno bili osnov za neprihvatanje date preporuke za izbor najpovoljnijeg ponuđača i dodjelu ugovora. Uvidom u priloženu dokumentaciju, utvrđeno je da je Komisija u svemu pravilno postupila, u skladu sa svojim ovlaštenjima i relevantnim propisima, detaljno obrazlažući svoje radnje u svim fazama postupka, zbog čega je ugovorni organ utvrdio da je izbor najpovoljnijeg ponuđača izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Na osnovu izloženog, a primjenom člana 64. stav 1. tačka b) Zakona o javnim nabavkama, odlučeno je kao u dispozitivu.

**POUKA O PRAVNOM LIJEKU:** Protiv ove odluke može se izjaviti žalba Uredu za razmatranje žalbi, putem ugovornog organa, Općine Maglaj, u roku od 10 dana od dana prijema ove odluke.

**DOSTAVLJENO:**

1. Ponuđači – putem maila
2. Služba za urbanizam, geodetske i imovinsko-pravne poslove
3. Web stranica
4. a/a



OPĆINSKI NAČELNIK

Miro Suljaković

